

長蘆鹽法志

總目

卷一

諭旨一

卷二

諭旨二

卷三

天章一

文 聯額 詩

卷四

天章一詩 恩賞文詩墨刻

卷五

盛典

卷六

優恤 恤商 恤竈

卷七

律令 律例 考成 緝私

卷八

場竈

卷九

轉運上 引地引額附運道 引名 引式 引目

卷十

轉運下 學配 鹽價 融銷 順天直隸轉運表 河南轉運表

卷十一

賦課上 商課 徵解 奏銷 交盤

卷十二

賦課下 商課目 商課表 竈課目 竈課表

卷十三

職官上

官制

職掌

卷十四

職官下

官表

易官表

卷十五

奏疏上

卷十六

奏疏下

卷十七

人物

忠節

孝行

貞女

友義

文學

選舉

附學額

節

節

卷十八

文藝 文 詩 紀恩詩

卷十九

營建 行宮 海河樓 皇船塢 浮橋 撥  
船 衙署 學校 廟宇 捐施

卷二十

圖識

附編

援證一

歷代優恤

援證二

歷代律令

援證三

歷代場竈

援證四

歷代轉運

援證五

歷代賦課

援證六上

歷代職官考

援證六下

歷代職官傳

援證七

歷代奏疏

援證八

歷代人物

援證九

歷代文藝

援證十

歷代營建

附古蹟



長蘆鹽法志卷二

諭旨二

乾隆元年正月奉

上諭長蘆衆商有舊欠未完銀一十六萬有零俱繫從前積累現在帶徵之項非現年額課可比著將所欠之數從乾隆元年爲始分作十二年徵收欽此。

乾隆元年正月二十日奉

上諭私鹽之禁所以除蠹課害民之弊大夥私梟每爲盜賊逋藪務宜嚴加緝究然恐其輾轉株連故律載私鹽事發止理人鹽

並獲其餘。獲人不獲鹽。獲鹽不獲人者。概勿追坐。至於失業窮黎。肩挑背負。易米度日。不上四十觔者。本不在查禁之內。蓋國家於裕商足課之中。而卽以寓除奸愛民之道。德意如是其周也。乃近見地方官。辦理私鹽案件。每不問人鹽曾否並獲。亦不問販私觔數多寡。一經捕役汛兵指挈。輒根株嚴究。以致挾怨誣扳。嚴刑逼認。干累多人。至於官捕業已繁多。而商人又添私雇之鹽捕。水路又添巡鹽之船隻。州縣毗連之界。四路密布。此種無賴之徒。藐法生事。何所不爲。凡遇奸商夾帶。大梟私販。公然受賄縱放。而窮民擔負無幾。輒行拘執。或鄉民市買食鹽一

二十劬者。並以售私掣獲。有司卽具文通詳。照議杖徒。又因此互相扳染。牽連貽害。此弊直省皆然。而浙江尤甚。朕深爲憫惻。著直省督撫嚴飭各府州縣文武官弁。督率差捕。實掣奸商大梟。勿令疎縱。其有愚民取私四十劬以上被獲者。照例連結。不得拖累平人。至貧窮老少男婦。挑負四十劬以下者。概不許禁捕。所有商人私雇鹽捕。及巡鹽船隻。幫捕汛兵。俱嚴查停止。毋得滋擾地方。俾良善窮民。得以安堵。欽此。

乾隆元年三月奉

上諭。朕聞姦宄不鋤。不可以安良善。風俗不正。不可以興教化。聞

閹之大惡有四。一曰盜賊。三代聖王所不待教而誅者也。二曰賭博。干犯功令。貽害父兄。以視周官之罷民。未麗於法而繫諸嘉石。收之圜土者。罪有甚矣。三曰打架。卽周公所謂亂民。孟子所謂賊民也。四曰娼妓。則自周以前。人類中未嘗有此。此四惡者。劫人之財。戕人之命。傷人之肢體。破人之家。敗人之德。爲善良之害者。莫大於此。是以我。

皇考愛民之深。憂民之切。嚴申糾禁。戒飭守土之官。法在必行。日夜捕緝。積歲月之久。然後道路少響馬。及老瓜賊。而商旅以寧。賭博及造賭具者。漸次改業。而家室以安。聚黨打架者。斂跡。而

城市鄉鎮鮮聞鬪鬯娼妓遠藏不敢淹留於客店。此

皇考十有三年。政教精神所貫注。而海內臣民。顯見其功效。實享其樂利也。朕自嗣位以來。蠲免租賦。豁除賠累。裁革積弊。增廣赦條。無非惠保良民。使得從容休息。衣食滋殖。而無識諸臣。誤謂朕一切寬容。不事稽察。以致大小官吏。日就縱弛。民間訛言諸禁已開。風聞直省四惡。皆微露其端倪。卽如天津一帶。私鹽橫行無忌。恐其他類此者。相繼而起。是守土之官。敢恃。

世宗憲皇帝之明旨。隳十有三年之成功。而戕賊善良。傷敗風俗也。自後州縣官有政令廢弛。使四惡復行於境內者。該督撫不

時訪察。卽行嚴參。督撫司道郡守。有不能董率州縣殫心捕治者。或被內外臣工核實列奏。或朕訪聞得知。必以溺職治罪。與通苞苴受賄賂等。決不輕貸。爾諸臣慎毋泄泄沓沓。自取殃咎。戒之戒之。特諭。欽此。

乾隆三年正月初八日奉

上諭。昔年各省解京餉銀。有隨平陋規一項。雍正元年蒙

皇考諭令停止。嗣因清查部庫。約計虧空銀二百五十餘萬兩。事歷多年。難於究問。經怡賢親王。以各色浮費。旣已禁革。奏請將京餉平餘陸續彌補。以重國帑。每餉銀一千兩。收平餘二十五

兩較之從前陋規雜費減省已多。至雍正八年虧空補足。欽奉  
皇考諭旨。嗣後解部平餘銀兩。著照從前之數。減去一半。此項原  
出於錢糧耗羨。卽留於本省。以備地方公事之用。欽遵在案。是  
以年來解部之平餘。已較原數裁減一半矣。朕思平餘。卽繫耗  
羨。並非別有加徵。解交部庫。與存貯藩庫。均爲國家公事之需。  
但目前尙有平餘解部之名。恐外省官吏。或有借端需索者。亦  
未可定。從乾隆三年爲始。將減半平餘銀兩。一概停其解部。卽  
存貯本省司庫。遇有地方荒歉。及裨益民生之要務。確應賑恤  
辦理者。卽將此項奏明動用。報部查核。此項旣出民力輸將。仍

令一絲一粟均濟百姓之急。朕何取焉。若該省大小官員有奉行不善。使百姓不沾實惠者。朕惟於該督撫是問。欽此。

乾隆十一年閏三月奉

上諭。長蘆所屬各州縣場。所有乾隆七八九年緩徵帶徵銀兩。今屆開徵之期。雖應依限催輸。以完正課。但念該處連歲荒旱之後。上年雖獲秋收。竈戶究未充裕。若令其並完數年舊欠。未免拮据。著將長蘆所屬各州縣場。應完乾隆七八九年帶徵緩徵銀一萬一千一百餘兩。自丙寅年起。分作三年帶徵。以紓竈力。該部遵諭速行。欽此。



乾隆十一年五月二十三日奉

上諭直隸通省今年地丁錢糧已全行蠲免其慶雲鹽山二縣本年應徵竈課銀例不在蠲免之內朕念二縣當積欠之後屢次加恩今雖得透雨但收成尙難懸定若此項竈課銀兩照例按期催納民力未免拮据著將慶雲鹽山二縣本年應徵竈課暫緩徵納俟秋收豐稔該督撫奏明開徵該部卽遵諭行欽此

乾隆十一年十二月初九日奉

上諭直隸慶雲鹽山二縣竈課節年災緩並帶徵等銀前經降旨自丙寅年起分作三年帶徵但思二縣積欠之餘元氣未能全

復。若將分限帶徵舊欠。一並開徵。以一年而完積年之欠。未免拮据。所有該二縣。本年應起限帶徵竈課銀兩。著緩至丁卯年。照原案起徵。俾緩舊徵新。以紓竈力。欽此。

乾隆十四年二月十三日奉

上諭。據長蘆鹽政麗柱奏稱。大軍凱旋。辦理一切善後事宜。官兵糧餉等項。在在需用。其撥協軍餉之各省歲支俸餉。亦所必需。請照康熙十四年之例。蘆東每引增銀五分。並請敕令兩淮。兩廣。河東。浙江等省。一體按引增課等語。此奏殊屬猥瑣鄙陋。金川用兵。供億固爲浩穰。但國家當全盛之時。無論已經降旨允

降班師。卽令尚在進兵。公帑所儲。儘足敷數年之用。不致拮据。且康熙十四年。增加鹽課。原因開創未久。三孽煽動。兵連數省。正供闕乏。不得已而爲之。旋卽復舊。今時勢懸殊。豈可援以爲例。至山西淮浙商民捐輸。旣屬伊等感沐。頻年蠲免。恩膏願出。餘資少裨饋運。而按例議叙。又蒙優典。初非勒派科斂。強以必從也。其近日議復米豆稅額。則全不爲軍興而然。蓋自免稅之初。卽有以利商而無益於民爲說者。朕念切民依。堅持不允。乃行之數年。米價不惟不減。且視舊益昂。無分豐歉。騰湧如故。則其果爲無益。殆可概見。不若仍舊徵收。以備賑恤。優免之用。朕

尚慮復稅後。奸商乘機增價。或致病民。特旨詢問管理關稅之人。今據倭赫奏。開徵一月有餘。較前毫無增減。足驗米稅復額一事。洵爲理勢之必當變通者。朕辦理庶務。悉斟酌時宜。一出於大公至正。豈肯稍有假借。規小利而啟迎合之端。而衆人不能體會。轉以其私意小見。臆度觀望。紛起言利。豈朕而容聚斂之說。得以行於今時哉。昨有唐綏祖倡捐養廉之奏。朕已降旨申飭。今麗柱復以增課爲請。是羣情之不顧大體。競思懸擬。此風斷不可長。若不加懲警。將來效尤波靡。習尚日益澆漓。閭閻不無驚擾。麗柱著交部察議。罷兵之舉。斷自朕衷。卽此而觀。非

特民命國儲。得以休養生息。而於人心風俗。亦大有維繫繫焉。偃革。更何疑焉。著傳諭中外知之。欽此。

乾隆十五年十月十八日奉

上諭。今歲夏秋雨水過多。長蘆鹽價昂貴。收貯之處。又多被水耗損。各商辦運未免艱難。所有本年應徵鹽課銀兩。除春夏二季。仍照例催徵外。其本年秋冬二季正課加課等銀。著加恩分作二年帶徵。以恤商力。該部卽遵諭行。欽此。

乾隆十六年六月奉

上諭。兩淮運銷丁卯戊辰己巳三綱引鹽。皆照貴價。曾經部駁。追

繳。今該鹽政吉慶等。又復奏請免追。該部仍照例議駁。此雖部例。但向來各省鹽引。原聽其自相交易。無官爲限制之例。長蘆河東至今尙然。惟兩淮行運江楚鹽引。適因崔紀沾名。三保庇商。兩持異議。始將各商運楚成本分別。定以賤價貴價。然自定價以來。商人總以貴價銷售至今。夫恤民裕商。本屬一事。若任其屢擡時價。日引月增。則於民食有關。然勒令賤賣。則該商等又以成本有虧。不免紛紛籲請。今計各商比年行銷價值。於成本自可無虧。將來卽藉口年歲之不齊。料亦不過如今之所稱歉年而止耳。嗣後淮商銷售引鹽。卽遇應貴之年。亦不得於現

在所銷價值外。復議稍有加增。庶可示以限制。至歲事豐稔。鹽價可以酌量平減。則令各該督撫會同鹽政等隨時籌畫妥辦。部臣亦不必固執定例。徒滋駁詰之繁。庶於商民均爲有益。至部議已賣貴價。復令商人追繳之處。事理亦屬難行。若云買貴在民。則仍應給還食鹽之戶。於勢固有所不能。否則以商人市值所餘而歸之官帑。於政體尤有所不可。總之民間物價。本自不齊。祇可隨時調劑。不能概繩以官法。卽如人生日用最急者。莫如食米一項。今謂意在恤民。而欲官爲立制。務使市價損之又損。閭閻皆得賤食。意則美矣。欲其行之於事。能乎不能乎。國

家休養生息。百有餘年。戶口繁衍。自古希逢之盛會。人庶則用廣。用廣則價昂。此一定之理。經國者要在務持大體。而於事勢通變。羸縮之間。爲之補偏救弊。俾庶政皆得其平。卽所以嘉惠元元者。不外是矣。因議鹽法。故推類及之。而因時立制之道。實亦不外於此。將此詳諭中外知之。欽此。

乾隆十六年八月十一日奉

上諭。今年長蘆竈地。既有被災之處。著將長蘆十五年分帶徵課稅。所有本年應交一半之項。著加恩分作三年。自明年爲始。次第徵收。以紓商力。餘依議。欽此。



乾隆十七年八月初三日奉

上諭前因長蘆各商積欠甚多。令其每引加鹽五十觔。分派行銷。續經部核。每年應增課銀八萬九千餘兩。但蘆商積困之餘。舊欠甫清。若按觔加課。商力未免拮据。著將所加鹽觔減半納課。永爲定額。其乾隆二年至六年應追未完加觔課銀一十四萬餘兩。著一併加恩豁免。以示恤商之意。欽此。

乾隆十八年六月奉

上諭據吉慶奏。鹽屬銷引地方。賣鹽錢文。悉令在本州縣市集出易。不得囤積在店。運往他處。售賣射利等語。吉慶此奏。爲商人

國積射利起見亦疏通錢法之一端。但各省鹽務地方情形不一。著將此摺抄寄各督撫鹽政。令其查察所屬情形。若果如吉慶所辦。立法稽查。行之可有實效。不致滋擾商民。著卽奏聞。仿照辦理。如或有未便之處。亦不必勉強。著詳悉酌量具奏。欽此。

乾隆十九年十一月奉

上諭。長蘆鹽政普福奏蘆東衆商情願捐銀三十萬兩。稍充軍營賞需用。且援金川之例爲請。此甚非是。金川用兵。適當朕普免天下錢糧數千餘萬之後。又值江南水災。賑濟撫恤。需用過多。是以兩淮蘆東浙閩等處。各商之急公捐輸者。不便阻其報

効之忱。俯允所請。其實於軍需所費何裨萬一。方國家全盛。府庫充實。適當準夷報讎者。接踵而至。應籌其遊牧。俾令入安。且彼自亂。機有可乘。此不過以餘力舉之。已屬裕如。而近年以來。各省年穀順成。倉儲豐羨。卽去秋淮徐諸郡被水成災。賑恤所需。亦不下數百萬。而每歲冬季。八旗兵丁諸賞賚。按例舉行。並不因西北軍需。於應用帑項。稍存裁節之見。統計經費。仍復有盈無縮。何至遽以商捐爲請耶。向來偶遇軍興。災賑之事。不知輕重之人。多思藉以開例報効。然果使籌餉報荒動項。經畫則捐輸踴躍。原屬臣民忠愛之誠。而此時則殊可不必。况天地生

財貴於流通。庫藏所積既多。而臨時又復別籌取益。殊非用財大道。朕所不爲。軍需所費。邊境資以流通。郡內商民。亦均爲有益。普福此見甚小。著傳旨申飭。恐各省復有踵而行之者。是用明降此旨。諄切曉諭。令內外諸臣。共知朕意。欽此。

乾隆二十二年七月十九日奉

上諭。今年豫省之衛。及直隸之大名等。驟因水漲。鹽觔漂沒。已降旨該鹽政。飭商照數補運。接濟民食。但念秋運現已屆期。與補運同時共辦。重費資木。目下正值催徵引課之時。若令依期交納。商方未免拮据。著加恩將鹽觔被水各商。交該鹽政查

明本年應徵課銀確數。分限三年帶徵。俾得從容完繳。朕此番加恩。原爲軫念災黎。該商等旣蒙優恤。毋得藉口被災。加價牟利。該鹽政其隨時稽察。用副朕卹商惠民至意。此旨並令該撫知之。欽此。

乾隆二十四年三月初八日奉

上諭。官著奏據長蘆山東商衆呈稱。屯田塞上。中外一家。情願公輸銀三十萬兩。稍備屯餉之需。不敢仰邀議叙等語。長蘆山東各商辦課素屬急公。今復籲請捐輸。情詞肫懇。著允所請。卽令官著委員解赴甘省。交與該督吳達善收備軍屯賑務之用。該

商等仍著交部議叙。欽此。

乾隆二十六年十月初一日奉

上諭。戶部議駁長蘆鹽政金輝鹽課緩徵一摺。自屬按例定議。但念該處鹽場。今秋雨水過多。商力未免稍艱。著加恩將長蘆本年未完鹽課四十二萬兩。準其緩至明年奏銷之後。分作五年帶徵。以示體恤。餘依議。欽此。

乾隆三十一年十月二十四日奉

上諭。銀庫所奏月摺內地丁款下。開寫絲毫忽微等細數。緣各省徵收之時。必須先有撤數。方可合併計算。彙成總數。是以照例

開寫。但此等名目。既已極其纖細。而秤兌時。並不能將此絲毫  
忽微之數分晰彈收。徒屬有名無實。於政體亦多未協。嗣後各  
省徵收錢糧。及一切奏銷支放等事。俱著以釐爲斷。不必仍前  
開寫細數。其如何將奇零名目。核計歸減之處。著該部詳悉定  
議具奏。欽此。

乾隆三十二年三月初五日奉

上諭。朕此次臨幸天津。該商等趨事辦公。頗稱踴躍。因念長蘆通  
綱引課。每年十月內奏銷。正值銷售菜鹽之時。鹽價未及收齊。  
而奏限已屆。商力未能舒徐。著將長蘆通綱鹽課。嗣後改至十

一月底奏銷。俾得從容完納。以示體恤。欽此。

乾隆三十六年二月奉

上諭。上年夏間。天津等處。因雨水過多。被災較重。業經疊降諭旨。動撥銀米。蠲賑頻施。黎民幸無失所。第念長蘆鹽坨。同時亦被淹浸。該商等工本。不無稍虧。既仍照常納課。又不能與貧民一體霑恩。未免向隅。今翠華臨莅。深悉該處情形。且諮訪錢價。較前更爲平減。雖去歲曾加鹽價。現在商力。仍覺拮据。著加恩。每觔再暫加一文。以降旨之日爲始。定限一年。仍照舊值行銷。俾資充裕。以副朕因災恤商之意。該部卽遵諭行。欽此。



乾隆三十六年十一月三十日奉

上諭。本年恭逢

皇太后八旬萬壽。兩淮長蘆浙江等處商人來京恭辦

慶典。踴躍可嘉。業已優加賞賚。並將淮商提引案內應繳銀兩。再

展限以示體恤。更念該商等一體辦公。而總商甲商叨恩獨厚。其餘商衆未能徧逮。因傳旨詢問李質穎等。令就各處情形。查明具奏。今據奏覆。所有兩淮之梁鹽。安鹽二種。成本原自不同。價值不應一例。著將淮商之梁鹽。每觔增價二釐。安鹽。每觔減價二釐。在物價哀益。既以適均。民商亦爲交便。其長蘆商人應

完三十六年引課錢糧。準分作三年帶徵。以紓商力。山東商人每年應領額餘引五萬道。準其停領三年。其應完正雜課銀。仍照舊輸納。兩浙商人。準每引加餘鹽五觔。以三年爲限。如此分別加恩。庶總散各商。得以同霑愷澤。共沐

慈恩。用廣推

仁至意。欽此。

乾隆三十八年三月十六日奉

上諭。長蘆衆商。業素微。前兩次巡莅天津。閱視鹺務。深悉其情。是以節次加因。增價俾不致有墊累。並將乾隆三十六年引課。

分作三年帶徵。以紓商力。今翠華臨幸。各商無不踴躍歡呼。但念伊等第一限銀兩業已完交。而第二限帶徵之銀。與本年正課同時並納。仍不免稍形竭蹶。著再加恩。將三十七年正餘課項。自三十八年奏銷後起。分限六年帶徵。俾商力益臻寬裕。以示格外體恤。該部卽遵諭行。欽此。

乾隆三十八年十月初四日奉

上諭據西寧奏商人楊永裕等呈稱。現值大兵進剿金川。各商志切同讎。末由自効。今長蘆商衆情願捐銀六十萬兩。山東商衆情願捐銀三十萬兩。稍供軍需賞賚等語。該商等踴躍急公。情

詞懇切。姑允所請。並著該鹽政將各商捐銀數目核定等次。卽行咨部。照例分別議敘。原摺並交戶部存核。欽此。

乾隆四十一年四月十九日奉

上諭。朕因平定兩金川集勲奏凱。恭奉

皇太后安輿。巡幸山東。告功

闕里。茲回程駐蹕天津。長蘆商衆。祇應迎鑾歡欣踴躍。具見惻誠。用宜優恤羣情。俾沾慶澤。著加恩將長蘆本年應完乾隆四十年分。引課銀四十九萬八千五百餘兩。及未完前年借項銀四十三萬二千兩。自本年奏銷後起限。分作八年帶徵。俾商力

益資饒裕。該部卽遵諭行。欽此。

乾隆四十三年八月二十一日。鹽政西寧奏。請將本年應徵引課四十萬兩。分限五年完交。戶部議駁。內閣傳

旨詢問。令其將實在情形。明白覆奏。並將戶部所駁情節。抄寄西寧閱看。俟西寧覆奏到日。再降諭旨。十月初十日。據西寧覆奏。查蘆商引課。全賴銷售醬菜。二季收齊鹽價。始敷辦納。本年水淺阻運。以致運本不能週轉。據實奏覆。本日奉

上諭。戶部議駁長蘆鹽政西寧奏。請將本年應徵引課銀四十萬兩。分限五年完交一摺。固屬照例議駁。但據該鹽政奏稱上年

額課全賴本年營菜二季。鹽價收齊完課。本年春夏運河淺阻。又兼儀封一帶被水。以致銷運遲滯等語。自屬實在情形。所有長蘆應完四十二年正餘引課銀四十萬兩。著加恩準其展限分作五年完交。以紓商力。欽此。

乾隆四十八年八月奉

上諭。行在戶部議覆長蘆鹽政徵瑞奏封船備剝情形。應設法調劑一摺。已依議速行矣。楊村剝運事宜。從前方觀承辦有成規。於速運通商兩無妨礙。本屬妥協。近年以來。因直隸督臣屢經更換。適遇青龍岡決口未堵。漕運緊急。需撥甚多。該道府辦理

不善胥役必藉端勒索紛紛封禁守候無期並將重載貨船差押起卸概令騰空備撥以致客貨聞風裹足船戶畏避不前不待鹽運無船貽誤帑課並恐商貨壅滯京師百物昂貴於民間食用大有妨礙尤屬不成事體徵瑞所奏甚是著劉綬速卽親身前往天津會同徵瑞督率道府等實力妥辦酌定章程具奏遵行以垂永久至徵瑞旣爲此奏自必有所見聞如該道府等果有辦理不善及縱容胥役需索滋擾情弊卽著告知該督據實嚴參以示懲儆毋稍瞻徇欽此。

乾隆四十八年十一月奉

上諭軍機大臣會同戶部議覆。浙省沿海及山僻等處緝私武員。所有歲支盤費薪水。準其照舊留支一摺。已依議行矣。武職緝私。分所應爲。旣已酌給養廉。自不應再得鹽規銀兩。業經部議概行刪除。歸入運庫造報撥用。惟與本汛相距遙遠地方。所派千把外委。仍準於鹽規項下。酌給盤費。爲數亦原無多。但恐各省武職內。或有不肖員弁。奉委緝私。藉巡查往來盤費薪水。爲詞。仍向商人索取銀兩。是鹽規一項。名裁而實留。且於歸公外。復行私給款項。則該員等影射重支。轉爲商人之累。不可不防其漸。著傳諭有鹽務之各省督撫。所有前項鹽規議裁之後。是



否不復私給。有無需索。重支情弊。並將如何設法查禁緣由。據實覆奏。將此諭令知之。欽此。

乾隆五十年六月。長蘆鹽政徵瑞奏請。本年應完引課。分年帶完一摺。經部議駁。奉

旨。部駁甚是。但念本年直隸各屬。雨暘應候。一麥雖屬有收。而河南被旱地方較廣。麥收歉薄。鹽引不能暢銷。亦屬事理。所有商力究未免拮据。著加恩將本年長蘆應完正餘引課。暫行緩徵。分作三年帶完。以紓商力。此後不得援以爲例。欽此。

乾隆五十年九月初四日奉

上諭據徵瑞奏向來南糧入北河後俱繫官雇民船撥運未免守候需時並致商鹽艱於挽運茲據長蘆商人呈請捐銀三十萬備造撥船一千餘隻並請賞借庫項各商按引均攤分限十年歸款如蒙俞允卽由運庫內動撥解交劉峩派員趕緊成造等語官雇民船撥運漕米最易滋弊今另造官船隨時應用民船既可免官封商鹽亦足敷挽運且旗丁等向用撥船雖繫官爲雇辦究不免小有津貼今既有官船該丁等亦可節省浮費而該船戶於空閒時仍可攬載營生公私俱有裨益已明降諭旨準行矣至徵瑞所奏請交劉峩派員成造一節此項撥船繫一

千餘隻所需板片木料較多。直省恐不能應手。卽營造工匠亦不如江廣等省之諳習。所有應造船隻。卽著徵瑞開明丈尺數目。知照特成額。吳垣。舒常。令該督撫等於湖廣江西二省。遴派委員。各趕造五百餘隻。以供撥運。惟明歲新漕。頭二進前抵北河。卽需撥船備用。約計彼時湖廣江西成造之船。恐未必卽能運到。並著特成額等。將此項船隻。趕緊成造。先得一半。或三分之一。於明年二三月前。卽派員送到直省應用。免致臨時又須雇用民船。其餘一半。仍飭安速趕辦。於該二省漕船開行時。隨幫前抵北河。庶不致遲悞。至成造此船。每船一隻。計用銀三百

兩。上下工價已屬寬裕。特成額等應嚴飭承辦各員。務將所用  
工料切實造辦。期於堅固經久。不致易於損壞。至應用帑項。若  
由長蘆解往。徒滋煩費。卽著特成額等各於該省耗羨閒款等  
項內。各動支十五萬兩。辦理工。核銷。其長蘆商人分限  
十年應歸之款。仍著徵瑞按限催繳。所有成造船隻。送到直省  
後。並著劉戡交沿河州縣官小心經管。毋致貽悞。此後不得再  
行封雇民船。致滋擾累。倘有借端累民者。著該督該鹽政。隨時  
查察。嚴行參奏。至該船戶除空閒攬載得有餘資。足敷養贍。應  
用外。其撥運漕糧銅鉛等項。應如何酌給船戶水手工食。及逐

年修艙之處。並著劉峩會同徵瑞。一併另行妥議具奏。將此由五百里傳諭。特成額等。並諭毓奇知之。欽此。

乾隆五十年九月奉

上諭。徵瑞奏請備造撥船以濟鹽漕一摺。據稱南漕入北河後。撥運船隻向繫官爲封雇。未免守候需時。且船隻短少。商鹽艱於挽運。頗形掣肘。茲衆商請借帑造撥船一千餘隻。以濟撥運。嗣後不致封雇民船。於商人運鹽甚便等語。所辦甚是。向來南糧入北河後。俱繫官爲雇船撥運。而糧艘未到以前。封撥之船卽須先期預備。自不無守候之累。且船隻旣經封撥。於商鹽挽運

實屬有妨。自應設法調劑。以期鹽漕兩有裨益。今將此項撥船另行備造。則南糧一抵北河。即可隨到隨撥。不獨便於轉運。而民船得免官封。商引無虞壅滯。卽該旗丁等。既有官船撥運。較用封雇民船。更可節省浮費。且南糧未到之先。及漕糧運竣以後。該船戶仍可攬載營生。以資貼補。是備造此項船隻。於商民及軍衛各丁。均資利賴。自應如該鹽政所奏辦理。至船隻成造之後。著劉戡分交沿河州縣承管。遇有銅鉛及奉天河南麥豆等項。應需撥運。皆可隨時應用。並著該督嚴飭地方官。此後不得再行封雇民船。致滋擾累。該督及該鹽政。仍隨時稽查。如有

借端累民者卽行據實參奏。以副朕惜丁愛民至意。欽此。

乾隆五十一年閏七月二十二日奉

旨。戶部議駁徵瑞奏請長蘆商人應完正餘引課。展限八年一摺。固屬照例辦理。但念該商等應完課項。爲數較多。若同時並徵。未免竭蹶。所有長蘆應完正餘引課。原分三年帶徵者。著加恩分作六年帶徵。以紓商力。欽此。

乾隆五十一年九月初五日奉

上諭。據徵瑞奏現在撥船一千二百隻。尙不敷用。請於每年商交二錢款項內。撥銀九萬兩。添造撥船三百隻。仍交江西湖廣卽

於今冬動項興工趕造。來春南漕未到之先。運送至津備用等語。撥船多爲預備。於漕務事宜更爲有濟。著傳諭李世傑。何裕城。浦霖。卽照上年辦運撥船之例。就近動項。飭委熟諳幹員。迅速妥造。務於開春南漕未到以前。運送至津備用。徵瑞奏片。著抄寄閱看。並著傳諭徵瑞。查照舊式燙樣。分咨該省照樣成造。將此由四百里各傳諭知之。欽此。

乾隆五十二年二月二十四日奉

上諭。前據徵瑞奏。長蘆商人呈請捐銀三十萬兩。備造撥船。以爲撥運漕糧之用。民船得免官封。商引卽無虞壅滯。是以準其所



請令湖廣江西二省先行動項趕造解直備用。仍令該商等分限交納歸款。茲據該二省題銷成造撥船一千二百隻。實用銀二十八萬二千五百兩零。核計原捐銀三十萬兩。共節省銀一萬九千七百四十三兩零。除已降旨準照該督撫原題核銷外。所有該二省節省銀一萬九千七百四十三兩零。著該監政於該商等應行歸款時。按數扣除。毋庸照原捐之數交納。以示體恤。欽此。

乾隆五十二年十月奉

上諭吏部議覆琅玕題請以陸費鑑實授崇明鹽大使一本。陸費

鑑著該部於調補別省後卽準其實授。向來鹽大使因無地方之責。並不迴避本省。是以陸績籍隸浙江。仍發浙江委用。但思鹽場各官與州縣官專司民社者。雖屬有間。然鹽勛旣關繫民食。且所屬曬丁竈戶錢糧詞訟。俱繫該員經理。究恐有徇私瞻顧等弊。嗣後鹽務各員銓選分發。俱令迴避本省。其現在各省鹽務各員有籍隸本省者。著該部一體查明。籤掣更調。以示慎重官方之意。著爲令。欽此。

乾隆五十七年四月十二日奉

諭。前據戶部議駁穆騰額奏。蘆東商人節年緩帶各項。不準再

行展限一摺。原屬照例辦理。已依議行矣。但念該商等。費本微薄。從前原定七年限內。前數限應交緩帶銀兩較多。若令按限照數完納。商力究未免拮据。所有長蘆商人。乾隆四十八至五十四等年。緩徵引課。未完銀一百五十三萬六千餘兩。山東商人。乾隆四十八至五十五等年。緩徵引課。未完銀七十二萬六千六百餘兩。著加恩於本年奏銷後。仍按原限分作七年。將銀數均勻帶徵。以紓商力。該部知道。欽此。

乾隆五十八年三月十三日奉

王諭。原任杭州織造基厚。回京侍養。前來行在謝恩。經朕詢以福

崧在浙江巡撫任內。種種貪縱劣蹟。伊近在同城。豈得諉爲不知。何以並不參奏。基厚惟有俯首認罪。無可置辯。各省鹽政織造關差等。若以繫屬欽差。妄自尊大。或干預地方事務。則是自貽伊戚。固當治罪。至督撫等如有貪劣款蹟。一有見聞。自應據實參奏。方爲不負委任。卽如福崧在浙時。派令柴楨購買物件。侵用掣規月費。敗檢營私。又福崧之母游翫西湖。派令鹽道預備食用燈綵船隻等項。每次費銀千兩。劣蹟彰著。而基厚身同龔隲。不據實劾參。豈伊身爲織造。惟知坐享優厚。養廉於督撫聲名款蹟。全置不問耶。基厚繫內務府郎中。著降爲內務府筆

帖式以示懲創。著通諭各省鹽政織造關差。所有地方事件。固不得越職干預。如遇督撫等。有貪黷營私。及地方水旱偏災。督撫有諱飾不辦等事。俱應隨時查察。據實參奏。毋得如基厚之置若罔聞。並至如穆騰額之。惟知派累商人。封殖自肥。致干重譴。該鹽政織造關差等。務須共知警戒。遇事實心。倘有瞻顧徇隱。及恃有此旨。過甚滋擾等事。一經察出。必將伊等從重治罪。將此通諭知之。欽此。

乾隆五十八年九月二十二日奉

旨。戶部議覆長蘆鹽政徵瑞奏。蘆東各屬。本年應徵商課。請緩至

五十九年分限五年帶徵一摺。所駁甚是。第念上年該處雨澤愆期。收成稍歉。引鹽不能暢銷。今歲雖收成豐稔。商力轉輸不及。情形究屬拮据。但從前節年緩帶課項。已展至七年帶徵。此次若如該鹽政所請。再將本年商課分作五年帶徵。爲期未免太緩。所有本年長蘆應徵正餘引課銀五十餘萬兩。山東應徵引票課銀十八萬餘兩。著加恩自五十九年起。分限三年帶徵。以紓商力。欽此。

乾隆五十九年四月初一日奉

上諭。長蘆山東鹽務。商本素非饒裕。節經加恩調劑。以紓商力。今

翠華臨涖天津。蘆東各商俱情殷贍就。踴躍歡忻。具見悃忱。自宜特沛恩膏。以敷愷澤。所有長蘆山東未完六限三限緩徵及帶徵五限川餉。並本年應完正餘引票課銀三百八十八萬餘兩。著再加恩。於各原限屆滿奏銷後起限。統行接展三年。分年帶徵。俾商力益臻饒裕。以示朕行慶施惠有加無已至意。該部卽遵諭行。欽此。

乾隆五十九年十一月十七日奉

上諭。戶部議覆長蘆鹽政徵瑞等奏。蘆東鹽價改爲賣銀一摺。內稱現在市集錢價較賤。若如該鹽政等所奏。照依市價隨時核

算則較之長蘆現行鹽價。每觔約多賣錢二三文。及五六文不等。統計長蘆每年額銷引張。可多賣銀一百數十萬兩。卽謂蘆東嵯務。目前量宜變通。亦應核明該商等。每年約賠數目。量出爲入。兩得其平。未可稍存偏重之見。或致累及閭閻。徒飽商橐。請敕下各該督撫。會同鹽政。切實詳查。秉公酌議具奏。再行核辦等語。此事前據徵瑞等。奏稱蘆東商人以賣鹽錢文。易銀交課。多有賠折。且河南省行銷四省引鹽。惟蘆東專賣錢文。商情不無偏絀。請一體改爲賣銀以紓商力等語。朕以所奏繫爲調劑嵯務。似有所見。因交該部核議。至其中如何合算增減。一切委



折細數。朕豈能析及錙銖。今據部臣核奏。則稱若如該鹽政等所請。每年額銷引張。竟多賣銀一百數十萬兩。徵瑞等卽爲調劑商情起見。計其每年賠折。不過四五十萬兩。亦應酌其賠折之數量。爲變通。何得專事恤商。致令倍蓰得利。此語更近理。朕豈肯因恤商困。而令商受利。令民受困乎。其應如何酌中定議。使商民兩便之處。除原議大臣不議外。著交大學士九卿會同悉心妥議具奏。至徵瑞前奏。繫與梁肯堂福寧會同札商。該督等自必稔悉情形。何以並未將辦理偏重之處。詳細查核。率行隨同會銜。令其據實回奏。再蘆東引鹽行銷直隸山東河南江

蘇安徽五省。其銷售鹽筋。易銀交課。是否實有賠折。應如何量爲調劑。使商力寬紓。民無擾累。兩得其平之處。並著各該督撫各抒所見。一體秉公核議。據實迅速具奏。再降諭旨。欽此。

乾隆五十九年奉

上諭。梁肯堂覆奏蘆東鹽價改爲賣銀酌籌辦理情形一摺。據稱初接徵瑞札商之時。亦以改賣銀兩。商人獲利浮多。未免病民。曾經詳晰咨詢。嗣準徵瑞札覆。以商人應交正課外。尙有雜課餘引帑利運費等項。核計商人賠折實一百餘萬兩等語。此論不通。蘆東商人。因現在錢價較賤。易銀交課。不無賠折商力難

支。設以商之正課而論。或量爲變通。俾得營運有資。不致虧本。其事尙可準行。若以內府帑利而論。則繫商人應交內府借項。與民無涉。朕惠愛黎元。屢次蠲租貸賦。不惜帑金億千萬兩。豈肯爲商人應交內府些須帑利。轉將鹽價加增。致民受困之理。其事斷難準行。况此項帑銀。原繫該商等自行懇請借給者。並非官派其借。出於商人勉強也。且帑利祇繫一分起息。爲數甚輕。若商人等於民間自行借貸。焉得如此輕息。是商人已受其利矣。况從前借給時。本繫銀兩。並非錢文。此時何得以易銀耗折。牽合藉口。現在錢價雖賤。然從前商人領帑之時。據稱紋銀

一兩可易錢八九百文。以此核算。則該商等彼時自得利已多。且官借帑項爲日已久。節經加恩帶緩。卽就帑利言之。其所稱每年交納數目。亦不應至如許之多。是梁肯堂並未深悉原委。祇據徵瑞一面之辭。代爲附和。著傳諭徵瑞。將應交課帑。及帑利各項實數清冊。帶同經手總商數人。親自來京。聽候軍機大臣會同核辦。將此諭徵瑞卽令其速來。並諭梁肯堂知之。若梁肯堂現無要事。卽來同議更好。欽此。

乾隆五十九年十一月十八日奉

上諭。據徵瑞奏天津分司所屬豐財蘆臺二場灘副被淹。請照例

借給工本銀兩。以資整修等語。豐財蘆臺二場。因本年夏秋雨  
水較多。鹽灘圪坨被淹。自應趕緊修整。但竈戶貧乏居多。若盡  
令自行修理。恐致貽誤。著加恩準其照例於運庫存銀內。如數  
借給。仍令該鹽政督催各竈。上緊修整。以資興曬。所有舊借未  
完第六限工本銀。著仍限明冬完交。現借工本銀兩。卽自六十  
一年冬間起限。按限歸款。以示體恤。摺併發。欽此。

乾隆五十九年十一月二十四日奉

上諭。據徵瑞奏於天津關設立收繳小錢之局。曉諭過往客商。赴  
關呈繳等語。前因各省小錢充斥。曾經降旨通飭查禁。實力收

繳。並令各關口一體留心查驗。俾私販咸知儆畏。第思此等奸徒販賣。整千累百。捆載遠行。必不肯由陸路販運。攜帶多糜運費。致有虧折。總由水路行走。便於裝載。惟在責成各關津隘。實力稽查。一體收繳。小錢方可淨盡。著傳諭各關監督。於關津要隘處所。仿照徵瑞辦法。留心查驗。並設立收繳小錢之局。一律查收。曉諭各商等。赴關盡數呈繳。以清錢法。而絕弊源。將此諭令各關監督。並諭徵瑞知之。欽此。

乾隆六十年閏二月二十日奉

上諭。徵瑞奏長蘆所屬並無積欠。惟竈戶因災帶緩未完課銀。其

五千二百一兩等語。前經降旨將各省錢糧積欠並兩浙積欠  
竈課。及因災緩徵等項俱經普行豁免。今長蘆竈課未完五十  
七五十九等年。因災帶緩銀五千二百一兩九分二釐。並著加  
恩一體豁免。以示朕加恩無已至意。欽此。

乾隆六十年九月初二日奉

旨。戶部議駁長蘆鹽政方維甸奏請將本年應徵課銀分年帶徵  
一摺。蘆東商力疲乏。經朕節次加恩。停利展本。已爲至優極渥。  
若再行緩徵。年限過寬。勢必層層積壓。戶部照例議駁。自屬核  
實辦理。第念該商人等。費本微薄。上年行鹽各地。間有雨多歉

收銷鹽未暢。應交款項尙多。若一律徵輸。未免稍形竭蹶。著再加恩。準其將本年應徵課銀七十餘萬兩。緩至明年起。分作二年帶徵。其節年緩徵銀三百三十餘萬兩。俟本年緩徵銀兩於二年限內交完時。再行起限。仍照從前奏定年分。次第按限帶徵。該商人等經此次加恩之後。費本愈臻饒裕。該鹽政惟當督率妥辦。按限輸將。勿得再任延宕。以副朕格外體恤。恩施無已至意。欽此。

乾隆六十年九月初五日奉

上諭。舊例在京王大臣及督撫等。每逢年節。備物呈進。酌量賞收。



原以聯上下之情來歲丙辰屆朕歸政爲太上皇若於年例之外添備一分呈進皇帝則伊等所得廉俸或不敷辦公且恐外省督撫致有藉端私行派累之事若祇備進一分伊等於心又有未安國家百年昇平大內備貯陳設物件甚多原可無需再行呈進徒滋糜費著自丙辰年爲始內外大臣所有年節三貢竟無庸備物呈進惟元旦及朕與嗣皇帝壽辰慶節在朝王大臣亦祇須備進如意以迓吉祥而伸悃忱逾日仍不過分賜衆人也至各省土貢及鹽政織造關差年例備進物件如果品茶葉之類繫備頒賞之用應仍照向例次數備進一分不得復有

增添別物。內外大臣職任部院封圻。惟當恪恭盡職。勉思報稱。原不在備物抒誠。嗣後務須仰體訓諭。遵照辦理。如有仍前備物。賈進者。必當交部議處。將此通諭知之。欽此。

嘉慶元年正月初二日奉

太上皇帝敕旨。前降諭旨。以丙辰年爲始。內外大臣年節三貢。毋庸備物呈進。但王公大臣等年節呈進如意。自雍正年間舉行至今。以聯上下新年喜慶之意。是以仍準呈進。分賜以迓吉祥。乃昨日貝勒貝子公等。及部院侍郎。散秩大臣。副都統紛紛呈進如意兩分。殊覺煩瑣。不可不定以限制。嗣後凡遇元旦。及朕

與皇帝壽辰慶節。宗室親王郡王滿漢大學士尚書始準呈進如意其餘概不準呈進。至外省督撫止準按例呈進土貢其鹽政織造關差俱有得項所有年例辦進備賞之物俱仍照向例按次呈進一分以備賞用不得復有增添倘伊等私自備物賣進一經查出必當重治其罪以節糜費而示體恤欽此。

嘉慶元年九月初五日奉

上諭戶部議駁長蘆鹽政方維甸奏請將本年應徵引課緩至明年奏銷後起限分作三年帶徵等因一摺蘆東商力疲乏經朕節次加恩停利展本已爲優渥若再行緩徵難免層層

積壓戶部照例議駁。自屬核實辦理。第念商人資本微薄。各處錢價過賤。易銀交課。不免虧折。尙屬實在情形。著加恩準其將長蘆應徵正餘引課銀五十三萬四千九百餘兩。山東應徵正餘引票課銀十七萬七千七百餘兩。緩至明年奏銷後起限。分作二年帶徵歸款。以紓商力。該鹽政惟當督率妥辦。毋得再任延宕。以副朕格外體恤恩施無己至意。餘依議。欽此。

嘉慶四年正月十五日奉

上諭。朕恭閱

皇考硃筆。有嚴禁內外大臣呈進貢物。

諭旨二道。

聖訓煌煌。

垂戒至爲明切。夫貢之爲義。始於禹貢。原指任土作貢而言。並非崇尙珍奇。所謂不貴異物。賤用物也。我

皇考頒諭飭禁。至再至三。祇因和珅攬權納賄。凡遇外省督撫呈進物件。準遞與否。必須先向和珅關白。伊卽擅自準駁。明示有權。而督撫等所進貢物。在

皇考不過賞收一二件。其餘盡入和珅私宅。是以我

皇考雖屢經禁止。仍未杜絕。試思外省備辦玉銅磁書畫插屏挂屏等件。豈皆出自己資。必下而取之州縣。而州縣必取之百姓。稍不足數。敲扑隨之。以閭閻有限之脂膏。供官吏無窮之腴削。民何以堪。況此等古玩。飢不可食。寒不可衣。真糞土之不若。而以奇貨視之。可乎。國家百數十年來。昇平昌阜。財賦豐盈。內府所存陳設物件。充牣駢羅。現在幾於無可收貯之處。且所貢之物。斷不能勝於大內所藏。卽或較勝。視之直如糞土也。朕之所寶者。惟在時和年豐。民物康阜。得賢才以分理庶政。方爲國家至寶耳。至應進土貢。原爲日用所必需。如

吉林黑龍江將軍。每年所進貂皮。東珠。人參。繫該處所產之物。其他如川廣之藥材。九江之磁器。江浙之綢緞。及徽墨湖筆。牋紙茶葉瓜果等項。原不外任土作貢之義。仍準按例呈進。所有玉銅磁書畫挂屏插屏等物。嗣後概不許呈進。至在京公王大臣。每年所進分例。尙不能敷當差之用。豈有餘資。亦不許呈進貢物。若內廷翰林所錄御製詩文冊頁。及自作書畫等件。尙可呈進。斷不許增入古玩。至各省鹽政織造關差等。並無地方理事之責。其應交盈餘銀兩。現今戶部查明。方擬酌減。伊等辦公。更可裕如。應進貢物。準其照例呈進。再

年節王公大臣督撫等所進如意。取兆吉祥。殊覺無謂。諸臣以爲如意。而朕觀之。轉不如意也。亦著一並禁止。經朕此次嚴諭之後。諸臣等有將所禁之物呈進者。卽以違制論。決不稍貸。特此明白宣示。通諭中外知之。欽此。

嘉慶四年三月十九日奉

上諭。董椿奏蘆東商人江公源等呈稱。目下川楚教匪。指日可除。惟安撫善後事宜。尙需繁費。長蘆商人情願捐銀六十六萬兩。山東商人情願捐銀三十四萬兩。共捐銀一百萬兩。稍抒忱悃等語。蘆東隘務。疊經豁免賞借。調劑多方。今該商衆



等因受恩深重。報効情殷。長蘆山東兩處。請共捐銀一百萬兩。固屬踴躍急公。若却而弗受。無以申其忱悃。但現在川楚教匪。卽日辦竣。其善後等事。需費無多。且蘆東商力。素稱拮据。所請捐銀一百萬兩。著各交十分之六。長蘆準其捐銀三十九萬六千兩。山東準其捐銀二十萬四千兩。解交部庫。仍著交部照例分別給予議叙。以示優獎。其董椿所奏蘆東商人。前領兩淮協濟無利運本銀一百萬兩。請於癸亥年四月起。仍按十限解交內務府充公之處。亦著照所請行。欽此。

嘉慶四年四月巡鹽御史董椿奏報得兩一摺奉

硃批。朕聞鹽價頗昂。民虞淡食。汝應如何調劑。據實覆奏。奏查長蘆鹽價。一由物價騰貴。一由錢賤賠折。今錢價漸長。各商甫有轉機。必須暫培元氣。請將錢價察看。如果日漸增長。商力頗見寬紓。自應將鹽價量爲酌減。奉

硃批。所議是錢價原無一定。鹽價一減。再加又難。總期商民皆便。無過不及。合乎中道耳。欽此。

嘉慶四年七月初八日奉

上諭。現在松筠奏請撥發餉銀解甘備用。因查本年兩淮長蘆浙省俱有商捐餉銀。經該鹽政等奏請分限交納。俱經降旨

分別賞收。此項銀兩正可撥給應用。所有兩淮解到銀五十萬兩。著胡季堂卽派員赴部領兌。照例接替解往甘省。其長蘆商捐之項。前據董椿奏明。應於九月內先交二十四萬。此項銀兩不必解部。卽著董椿解交胡季堂。一併照例委員解交送至河南。交吳熊光再行解赴甘省。其浙省商捐之項。前據奏明。應於秋季先交十六萬六千兩。亦著蘇楞額卽照數派員解交河南。由吳熊光派員接解甘省。以備軍需之用。松筠原請撥餉一百萬兩。今此三處解甘之項。合計已共有九十萬六千兩。較之松筠原奏。祇少解銀九萬四千兩。自可毋

庸補解矣。將此傳諭知之。欽此。

嘉慶四年七月二十五日奉

上諭。各省進呈方物。原以備賞賚之需。現在二十七月之內。萬壽慶節。並不舉行筵宴。無須頒賞。所有各督撫及鹽政關差。織造應進方物。概行停止呈進。若中秋節令。外間不過以瓜餅食物。酬酢往來。內廷並無宴賚之例。尤非萬壽及端陽歲除可比。嗣後中秋節貢。永遠停止。欽此。

嘉慶五年二月初七日奉

旨。戶部議覆長蘆鹽政觀豫奏蘆東商人舊欠課帑。再請展限

交納等因。一摺。蘆東商人舊欠課餉帑本銀兩。前經加恩。準其分作十二限完繳。茲據該鹽政奏請展至二十四限爲期。太寬。著照部議。準其自本年奏銷後起。分作十五限完交。俾商力益臻寬裕。餘依議。欽此。

嘉慶五年二月初六日奉

上諭。戶部議覆長蘆鹽政觀豫奏請蘆東鹽劬加價一摺。所駁甚是。已依議行矣。現在軍務尙未蒞事。一切兵餉供支。皆須發帑接濟。固應寬爲籌備。但朕斷不肯因此有累及閭閻之事。教匪何民也。原因不肖官吏勒索苦尅。激成此事。至今未

能復業。自滋事以來。到處焚掠。裹脅百姓。逼於飢困。不得已而從賊。是欲剗平賊匪。必先使吾民各安生業。民安而賊自可平。多安一民。卽少一賊。此事理之所必然者。若因軍興需費浩繁。遂思朘削百姓之脂膏。冀補國家之帑項。或至生計不足。別滋事端。卽言利則所費豈不更多。爲害更大。朕躬行節儉。永杜貢獻。言利之徒。無所施其伎倆。惟近日臣工。往往藉軍需爲名。在朕前嘗試巧言利國。實皆利己。此等假公濟私之人。本應加之譴責。但人材不易。豈遂以一眚遽斥。此時亦第存之於心。不肯宣露。早已薄其爲人矣。卽如長蘆加增

鹽價一事。雖計算食鹽之人。每日所費。不過一二文。似屬有限。而不知鹽勛爲食用所必需。一經議增。則人人均受其累。且私販本因官鹽過昂而起。今再議增加。則私鹽自必更爲充斥。官引墮銷愈多。長蘆鹽價加增。已非一次。卽該商積欠各款。節經寬免展限者。亦非一次。恩施不爲不厚。豈得復行干竇。爲此無厭之求。况鹽價旣增之後。卽不能復減。累民寧有已時。雖據觀豫奏稱此次加價。爲清完積欠而設。但加價之後。該商等亦未必清完國課。徒然病民以裕商。更屬不值。朕寧可使帑項有稽。而斷不肯朘民以益帑。况天下山陬海

滋。所有財貨。皆朕之財貨。豈必聚於宮府。踵瓊林大盈之鄙  
識哉。爲天子者。富有四海。不問有無。藏富於民。周流泉幣。斯  
得九五福之二曰富。大旨矣。昨兩淮浙江廣東各商。俱籲懇  
報効。而長蘆商人並未呈請出資助餉。更無可藉口。今若允  
該商等所求。致兩淮等處亦復效尤。紛紛懇請加價。更無所  
底止矣。朕勤求上理。惟思克己利民。以符損上益下之義。將  
來軍務完竣。卽見開捐例。亦當停止。豈有無故將鹽價加增  
之理乎。觀豫此摺。雖未必牟利私己起見。但率聽商人慫恿。  
遽行竄請。實屬不合。觀豫著飭行。將朕此旨。與諸王及大學



士九卿同看卽行覆奏欽此。

嘉慶五年四月二十七日奉

上諭顏檢喬人傑奏察看隆平寧晉等處被水情形請先挑淤以消積潦一摺據稱大營上村一帶爲運鹽河道亟宜先挑淤墊共估需土方銀一萬六千五百九十六兩零又寧晉東旺等處新挑河應開挖深通以洩泊水共估需土方銀二千七十三兩零又衡水縣之安濟橋孔多半淤塞請一律挑挖俾下流得以暢達共估需銀一千五十九兩零等語隆平寧晉等處因滹沱河與滏河會合漲水淤塞顏檢等察看情形

挑挖淤積以消積潦而利商艘所見尙是著傳諭胡季堂轉飭所屬將大營上村一帶運鹽河道及東旺至侯高村之新挑河並衡水縣之安濟橋孔卽日興工分別挑挖所有應需銀兩先行借款動用該督務須督令承辦各員認真經理使工歸實用帑不虛糜不可稍有浮冒又另片奏隆平寧晉二縣被水低窪村莊如積水不消請將該處應徵糧銀豁免並聽村民遷居高阜處所一節現在已將新挑河設法疏濬所有未消自可漸次宣洩若該二縣被水田地未能及時涸出其應完錢糧實難以徵收而民人又以遷居高阜爲便是該

處淤塞地段卽再動款挑挖疏通徒費無益自不如讓地與水轉爲利便著胡季堂於秋汛後親加履勘將該處情形詳悉酌核據實具奏候朕另降諭旨將此諭令知之欽此。

嘉慶五年六月十五日奉

上諭觀豫奏長蘆商衆捐挑河工需銀一萬六千餘兩請於運庫上年奏銷引課項下墊解分限二年完納一摺已依議行矣長蘆鹽務素稱疲乏今於捐挑運鹽河道需費不過一萬餘兩已須分限二年完納可見該處商力疲乏已極著傳諭觀豫嗣後惟當悉心調劑以期商力漸臻饒裕不可再有苦

累爲要。再昨據倉場侍郎達慶等奏。松江白糧幫船在天津縣海口地方。遇風沉溺。觀豫駐劄天津。何以並未據奏。及該處向有

海神廟。今特頒發藏香一炷。著交觀豫敬謹拈香虔誠默祈神佑。俾漕船經行咸臻安穩。將此諭令知之。欽此。

嘉慶六年六月十五日奉

上諭。那蘇圖奏天津河水驟長。鹽坨保護穩固一摺。覽奏俱悉。現在京師因大雨連綿。永定河決口四處。南苑一帶被淹。積水尙未消退。天津地居下游。將來永定河漫溢之水。疏濬下

注恐水勢過猛宣洩不及該處堤閘橋梁自應預爲防護並著查勘淀河近海一帶如有淤墊處所及早量爲疏濬俾水勢得以暢行至低窪村莊有被水淹浸者務卽轉飭地方官迅速查明設法疏消加意撫恤並據實具奏欽此。

嘉慶六年六月二十日長蘆鹽政那蘇圖奏天津四鄉被淹成災商鹽不能築運一摺本月二十八日奉到

硃批另有旨欽此同日奉

上諭那蘇圖奏天津四鄉被淹成災商鹽不能築運一摺此次天津地方因大雨傾注東南風緊海河倒漾之水漫溢府城

南門西門一帶民居被水淹浸四鄉亦俱被淹殊堪憫惻見在該地方官設廠煮粥並分投查勘務飭令加意撫恤勿致一夫失所除俟熊枚同興等查明奏到再行加恩外其摺內所稱天津瑪鹽坨地雨淋水浸存坨鹽觔盪沒二萬六千餘包見在積水未消不能配運等語自繫實在情形著那蘇圖卽查明該商等引地坨鹽被水輕重應如何酌量加恩展限之處分別具奏至京師連日天氣晴霽南苑及蘆溝橋一帶積水漸消天津地處下游恐水勢不無增長那蘇圖尤當會同地方官將堤埝加意保護俾得堅固無虞漕船重運飭令

小心行走爲要。將此諭令知之。欽此。

嘉慶六年六月二十八日奉

上諭周廷棟那蘇圖福會等。同日奏報天津被水情形。公同捐廉撫恤各摺。天津地勢窪下。當此河流盛漲。衆水滙注。所有被水災黎。自須安置棲止。妥爲賑濟。伊等捐廉撫恤。固所應然。前已諭令署直隸總督熊枚派員查勘。被災輕重。候降恩旨。但奏報尙須時日。災民嗷嗷待哺。恐緩不濟急。著那蘇圖於運庫閒款項下。動用銀二千兩。急爲撫恤。會同鎮道府縣實力辦理。毋使吏胥等從中侵蝕。俾災黎早沾實惠。此時糧

船重運正當北上。而天津河水陡長漫溢。絳道所有重船。不妨稍遲數日。毋庸過於催趲。冒險輕進。該巡漕御史等。惟當持以慎重。勿致稍有疎虞。至天津堤岸。自應會同地方官加意防護。所有被衝鹽包。俟那蘇圖通行查明後。另降諭旨。其綱總等認捐銀兩。幫補接濟。著準其於閒款項下借墊。再行歸款。欽此。

嘉慶六年八月初九日奉

上諭。那蘇圖奏蘆商坵鹽被水沖盪。懇請酌予展緩引課一摺。本年六月陰雨連綿。河水漲溢。沖盪坵鹽。成本虧折。挽運艱



難自繫實在情形。若將新舊應徵帶徵各款同時完納。誠恐商力不無拮据。著加恩將長蘆引地被淹。坵鹽復被沖盪之八十八州縣。各商應交五年正餘引課銀二十八萬五千七百餘兩。全行緩徵。於明年奏銷後起。分作四年帶徵。其直隸各引地未經被水。僅止坵鹽沖盪。恐致悞運之九十八州縣。各商應交五年正餘引課銀二十八萬六千五百餘兩。亦著加恩緩徵十分之五。並於明年奏銷後起。分作四年帶徵。再前此分限十五年帶完積欠課餉運本等項。原繫奏明本年起限完交。並著加恩將本年應完第一限銀三十六萬三千

四百餘兩。一併展至明年奏銷後起。仍照原定十五限完交。俾商力益資寬裕。該部卽遵諭行。摺並發。欽此。

嘉慶六年八月二十八日奉

上諭。那蘇圖奏長蘆商人捐備賑費。並請捐應修工程一摺。情詞懇切。具見好義急公。此次所捐棉襖粥賑銀二萬兩。在該商等誼切桑梓。自應俯如所請。準其在運庫領告項下暫借動用。於來年按引歸款。其捐辦河堤橋道。及行宮船隻廟宇書院等項工程。均繫該處地方應辦之事。亦可準行。至所請輸銀八萬兩。以備直隸賑需一節。此可不必。長蘆商人素稱

疲乏。昨因天津查辦急賑。該商等捐銀六千兩。幫補接濟。已足効其惻忱。若再輸納此項銀兩。商力不無拮据。所有捐賑八萬兩。著加恩賞還。以示體恤。欽此。

嘉慶六年九月二十七日奉

上諭。那蘇圖奏。場竈灘副池。坵被淹。懇請借帑修整。一摺。天津分司所屬豐財蘆臺二場。鹽灘逼近海濱。本年夏間被災。情形較重。該二場向來產鹽旺盛。關繫通綱。歲額行消。自應亟加修整。查照向例。分別借給修灘工本。著加恩於本年運庫徵收商課項下。借給銀六萬三百二兩。分限六年完交歸款。

該鹽政務須督飭上緊興修。一律完整。俾商運民食。並資裨益。該部知道。摺並發欽此。

嘉慶六年九月二十九日奉

上諭。那蘇圖奏被災竈地錢糧請照依民糧蠲免一摺。今年直隸被水各州縣。節經降旨。將本年應徵錢糧分別蠲免。竈地錢糧與民地事同一例。著將被災較重之滄州、冀州、衡水、交河、寧河、河間等州縣竈地。並各場坐落滄州、天津、靜海、寧河、寶坻、武清、蓟州、豐潤、交河等州縣境內竈地。本年應徵竈戶丁地錢糧。加恩全行蠲免。其被水稍輕之青縣、東光二處竈

地並各場坐落該二縣境內竈地本年應徵竈戶丁地錢糧蠲免十分之五。至蠲剩應徵銀兩仍著照民地分限帶徵以示軫恤災丁至意。該部知道。摺並發。欽此。

嘉慶八年閏二月初二日奉

上諭。賽尙阿奏陳明蘆商實在情形一摺。據稱長蘆自前歲被災後。諸物昂貴。繩席水脚辛火各項加增。其中灘鹽歉收。工價增至數倍。以致各商成本有虧。現在除額徵正雜等款。一百一十餘萬兩外。尙有本年起限應徵銀五十五萬餘兩。實難同時完納。懇請展限調劑等語。蘆商應行帶交各項銀五

十五萬餘兩。現在均已屆限應徵。此事若發交部議。自必照例奏駁。第念長蘆商力本疲。又因前年灘鹽歉收。諸物昂貴。若將應行帶交各款。同時並徵。該商等不無拮据。著加恩照賽尙阿所請。除本年應交課帑。及准本銀兩。仍令按照限期交納外。其本年起限之嘉慶五年。緩徵引課。分四年帶完者。緩至本年。奏銷後起限。改爲分二年完交。其分十五年帶完舊欠課餉帑本。於本年起限者。俟前項改分二年引課全完後。再行起限。按原分之限完交。以示體恤。該部知道。摺並發。欽此。

嘉慶八年八月十六日奉

上諭。顏檢。賽尙阿奏籌辦水利工程。請加鹽價一摺。直隸河道堤工。關繫閭省民生。數十年來。久未修濬。以致一遇水潦。卽有漲溢。自應上緊興修。俾遵正軌。惟工程浩大。需費殷繁。不得不通籌全局。分別經支。量其緩急。次第辦理。每年應籌出款項若干。方可舉行。今該督等請於現行鹽價之外。酌加制錢三文。一半作爲興舉大工之用。一半歸入鹽款。溯查乾隆年間。因錢價過賤。屢增鹽價。鹽務仍屬無益。現尙積欠至一千四十餘萬。是其明驗。目下錢價增昂。商人等行銷獲利。自

應漸有起色。是加價實屬無名。至籌辦水利。事關重大。何以必需加增鹽價。方可辦理。該督等所議。是否可行。著大學士九卿悉心妥議具奏。欽此。

嘉慶八年九月初十日奉

上諭。大學士九卿議駁顏檢賽尙阿奏籌辦水利工程請加鹽價一摺。此事本屬難行。鹽觔加價。不獨繫病民之舉。且官鹽價昂。則私販愈多。滯銷愈甚。若以興修水利籌款爲詞。則該督等所奏。每歲僅將加價銀六十萬餘兩。歸入河工。於目前修濬事宜。亦屬緩不濟急。顏檢尙來辦事尙屬認真。此奏未



必全繫該督主見。自繫饗尙阿輕聽商人之言。從旁慫恿。而顏檢卽會同入告。殊屬非是。顏檢饗尙阿著傳旨申飭。至該省河道堤工。數十年來。久未修濬。兼以前歲雨水過大。工段率多沖損。自宜及時興修。但水利事關重大。亦非一時所能猝辦。卽著顏檢派員履勘。應自某處起。再接修某處。約幾年可以完竣。統計需銀若干。現在興工。卽需銀若干。通盤籌畫。妥議具奏。俟奏到時。再降諭旨。其蘆東各省積欠帑項。該鹽政惟有嚴飭各商。遵照定限。上緊完交。若如該御史舒昇阿所奏。於應交積欠帑項下。另籌生息。事屬煩瑣。且商力斷有

所不能。朕豈肯因籌辦水利。總總計及錙銖乎。再前此鹽務加價。多以錢價過賤爲詞。年來錢價甚昂。商人等獲利增倍。而原加之價。既未議減。其所得盈餘。能否如該御史所奏。劃出歸公。仍著該督會同該鹽政體察情形。據實具奏。欽此。

嘉慶八年十一月十七日奉

上諭。玉慶奏據長蘆商人洪百順德興等呈稱。今秋東省被水成災。情願敬輸備賑銀十萬兩。現貯運庫。俟奉到諭旨。卽解赴山東藩庫交納等語。該商等因東省間被水災。捐銀備賑。原屬急公趨事之忱。第蘆東各商素形疲乏。方仰賴恩澤以

贍身家。豈能再有餘力。効憫輸將。况東省被災各州縣。早經降旨蠲緩兼施。現在辦理賑恤各事宜。帑項極爲寬裕。亦無藉該商等捐備之力。所有請捐銀十萬兩。著無庸賞收。以示體恤。至此項銀兩。據稱業經交納運庫。著該鹽政查明。卽抵作該商等應徵款項。倘本年款項已經清交。卽可留抵來年應繳正課之項。欽此。

嘉慶九年正月十九日奉

上諭。顏檢等奏查明長蘆現行鹽價。委無餘利一摺。前次鹽務加價。如果於按年完繳官項及應需成本之外。尙有盈餘。自

應劃出歸公。今既據該督等調查物價帳目。一切較前增昂。委無餘利。自繫實在情形。所有節年鹽務加價核計盈餘。應行歸公之處。竟無庸議。嗣後該督惟當會同該鹽政。實心調劑。俾鹽務日有起色。不令額課稍闕。其應交帑利等項。按期完繳。勿稍延緩。該部知道。欽此。

嘉慶九年九月十二日奉

上諭珠隆阿奏詳察商情籌議調劑一摺。該商等自嘉慶六年被水之後。物力加增。費用較昂。成本不能充裕。若將正課雜款等項。照依原限並徵。商力未免拮据。著加恩照該鹽政所

請將嘉慶九十兩年帶完緩徵五年引課銀四十二萬九千餘兩俟城工准本二項按年交清後再行歸入各限應交款內照數添交統計展至嘉慶二十八年限滿俾得從容完納用示朕體恤商人恩施格外至意欽此。